

Aaqqiissuteqaat

Allannguinermi siunnersuut 14. oktober 2020-meersoq taarserpaa

**Aaqqiissutinut pingarnernut nassuaat: Oqaasertaliornermi allannguisoqarsinavoq § 14
imm. 4 ammalu nassuaatinilu iluarsiissutinik, suliaqartoqarsimavoq.**

Allannguutissatut siunnersuut

Uunga

**Uunga siunnersuut: Ilanniartut sungiusartullu atorfinitssinnerini suliffeqarfiiit pisortanilu
oqartussaasut inuiaqatigiinni akisussaaffiat pillugu Inatsisartut inatsisaat nr. xx, xx. xxx
2019-imeersoq**

Aappassaaneerneqarnissaanut Suliffeqarnermut, Avatangiisut Ilisimatusarnermullu
Naalakkersuisumit saqqummiunneqartoq

§ 14-imut

1. § 14-imi imm. 3 aamma 4 ikkunneqassapput:

”Imm. 3. Suliffeqarfiiit aamma pisortani oqartussaasut ukiumoortumik Naalakkersuisunut
nalunaarutiginnittassapput, makku pillugit:

1) § 8 naapertorlugu ilinniarfissatut- imaluunniit sungiusarfissatut akuerisaaneq pillugu
ilinniarfinnut attuumassutilinnut attaveqartoqareersoq.

2) § 9 naapertorlugu ilinniarfissatut- imaluunniit sungiusarfissatut akuerisaanermisut,
nunaqavissunik ilinniartussanik imaluunniit sungiusartussanik atorfinitssisoqareersoq.

Imm. 4. Aammattaaq § 11 naapertorlugu inatsimmi matumani nalunaarutiginninnissamut
piumasagaatinik imaluunniit pisussaaffinnik eqquutsitsinngitsoornermi ilassutitut
nalunaarutiginninneq aamma isumaqatigiissuteqarnermi maleruagassiueq pilligit
aalajangersakkanik sukumiinerusunik Naalakkersuisut aalajangersaasinnaapput.”

§ 16-imut

2. § 16 imatut allanneqassaaq:

”**§ 16.** Inatsisartut inatsisaat ulloq 1. januaari 2021 atuutilissaaq.

Imm. 2. § 10, imm. 4 naapertorlugu 2021-mut nalunaarsornissamut piffissaq pillugu
aalajangersakkanik sukumiinerusunik Naalakkersuisut aalajangersaasinnaapput.”

Siunnersuummut oqaaseqaatit

Oqaaseqaatit nalinginnaasut

UKA 2019-imik Ilinniartut sungiusartullu atorfinitssinnerini suliffeqarfiit pisortanilu oqartussaasut inuaqatigiinni akisussaaffii pillugit Inatsisartut inatsisaat nr. xx, xx. xxx 2019-imeersup allangortinneqarnissaa pillugu siunnersuutip aappassaaneerneqarnissaa UKA2020-mut kinguartinneqarpoq.

Inatsimmik naammassinninnermik eqquutsitsinermillu nakkutiginninnerup annertusarneqarnissaa Suliffeqarnermut, Avatangiisinut Ilisimatusarnermullu Naalakkersuisup kissaatigaa.

Siunnersummi aalajangersakkanut ataasiakkaanut oqaaseqaatit

Nr. 1-imut

Imm. 3:

§§ 8 aamma 9 naapertorlugit Siunnersummut ilaatinneqartunut suliffeqarfinnut pisortanilu oqartussaasunut tamanut aalajangersagaq atuuppoq.

Suliffeqarfiit pisortanilu oqartussaasut siunnersummut ilaatinneqarnerlutik naliliinissamut attuumassutilit pissutsit aamma siunnersuut malillugu pisussaaffimminnik eqquutsitsisimanerlutik ukiut tamaasa allattortassavaat.

Ilinniartunik sungiusartunillu atorfinitssinissat pillugit siunnersummi aalajangersakkanik suliffeqarfiit aamma pisortani oqartussaasut eqquutsitsinerannik Naalakkersuisut ukiumoortumik misissuillutilu nakkutilliinissaannik aalajangersakkami periarfissinneqarput. Suliffeqarfiit imaluunniit pisortani oqartussaasut januaarimi nalunaaruteqassapput, taamaattumillu nalunaarummik nassiussinissamut piffissaliussaq kingulleq tassaavoq ulloq 31. januar. Aalajangersagaq taanna najoqqutaralugu suliffeqarfiup imaluunniit pisortani oqartussaasut nalunaaruteqarnissamik piumasaqaammik eqquutsitsinissaat pillugu Naalakkersuisut peqqusummik nalunaaruteqarsinnaapput.

Suliffeqarfiit aamma pisortani oqartussaasut imm. 3 naapertorlugu nalunaarsuilerunik Naalakkersuisunut nassiussugassaat paassisutissat aalajangersakkami tulleriaarneqarput.

Imm. 4:

Inatsimmi matumani nalunaaruteqarnissamut piumasaqaatinik imaluunniit pisussaaffinnik eqquutsitsinnginnermik pisoqartillugu, assersuutigalugu eqquutsitsinissaq pillugu nammineq piumassutsimik taamaattorli pituttuisumik isumaqatigiissummik isumaqatigiissusiorneq pillugu, pineqartut ataasiakkaatut nalilerneqarneri malillugit, § 11-imik eqqaaneqareersut kinguneqartitsinerit saniatigut ilassutitut isumaqatigiissuteqarnermi malittarisassiuineq pillugu Naalakkersuisut atulersitsinissaannut aalajangersagaq inatsisitigut tunngavissiivoq. Nammineq piumassutsimik isumaqatigiissut isumaqatigiissusiarineqarsinnaanngippat imaluunniit

eqquutsinnejarsinnaanngippat qungujunnertalimmik-aaqqissuussinermut eqqarsaatigineqartumut naleqqiullugu suliffeqarfimmut kinguneqartinneqarsinnaavoq.

Nr. 2-mut

Siunnersuutip aappassaaneerneqarnerata UKA 2020-mut kinguartinneqarnera tunngavigalugu allanguut inatsisilioriaatsikkut naqqiissutaavoq.